



**REPUBLIKA E SHQIPËRISË
ZYRA E PROKURORIT TË PËRGJITHSHËM
DREJTORIA E STUDIMEVE**

Nr. 306/Prot.

Tiranë, me 11. 04. 2007

L Ë N D A: Për përmirësimin e punës në mbledhjen ruajtjen dhe asgjësimin e provave materiale, me përbërje lëndë eksplozive.

PROKURORIVE TË SHKALLËS SË PARË

PROKURORIVE TË APELEVE

DREJTORIVE DHE SEKTORËVE

KËTU

**SHËRBIMEVE TË POLICISË GJYQËSORE
NË POLICINË E SHTETIT**

Duke evidentuar problematikën për mbledhjen dhe ruajtjen e provave materiale me përbërje lëndë eksplozive, si mina, municione, predha e granata të ndryshme, lëndë plasëse të fabrikuar apo të prodhuara në mënyrë artizanale, të përdorura për veprime të ndryshme kriminale;

Në Zyrën e Prokurorit të Përgjithshëm janë parashtruar shqetësimet, si më poshtë:

- në vendngjarje të shkaktuara me lende eksplozive ndodh që mbeten të pa asgjësuar municione të ndryshme ose pjesë të tyre, ngarkesa me lëndë eksplozive e mbetje, ndezës të ndryshëm e mbetje, elementë që i përkasin veprës penale, të cilët duhen gjetur, përshkruar, fiksuar e sekuestruar në cilësinë e provës materiale;
- në kundërshtim me normat e vendosura për sigurimin teknik të tyre, materialet e mbledhura në vendngjarje të tilla, ashtu siç janë gjetur, pa u bërë çaktivizimi ose çarmatosja e tyre, transportohen në zyrat e komisariateve të policisë apo të prokurorëve;

- sasi të mëdha tritoli, dinamiti e amoniti, të cilat i përkasin ngjarjeve të ndryshme mbahen në ruajtje në dispozicion të prokurorisë ose gjykatës, në magazinat e armatimit të komisariateve të policisë, deri në përfundim të çështjeve penale, kohëzgjatje që shkon deri disa vjet.

Me synim për të parandaluar ngjarjet aksidentale të mundshme, me pasoja për jetën dhe dëme materiale, të cilat mund të jenë rrjedhojë e praktikave në shkelje të masave për sigurimin e këtyre municioneve;

Ju sjellë në kujtesë, prokurorëve dhe oficerëve të policisë gjyqësore të të gjithë niveleve dhe strukturave, dispozitat ligjore dhe rregullat që duhen zbatuar për përcaktimin, fiksimin, mbledhjen, paketimin, ruajtjen ose asgjësimin e provave materiale me përbërje lëndë eksplozive të të gjithë llojeve, ushtarake apo komerciale, të gjetura dhe të sekuestruara në vendngjarje, si më poshtë:

1. Në vendngjarje me shpërthim mine ose lëndë eksplozive, oficeri i policisë gjyqësore, si subjekt i procedimit penal është person përgjegjës për kryerjen e këqyrjeve: - kur prokurori nuk mund të ndërhyjë urgjentisht dhe ka rrezik që gjurmët e sendet të ndryshojnë ose të humbasin¹, ose - kur prokurori njofton se nuk do të marrë pjesë në këqyrje, duke ia deleguar kryerjen e këtij veprimi oficerit të policisë gjyqësore².

1.1 Kur pasi ka filluar këqyrja, prokurori shkon në vendin e ngjarjes të kësaj natyre, ai mbikëqyr dhe udhëzon veprimet e këqyrjes në kontakt me oficerin e policisë gjyqësore, duke mos i hequr atij iniciativën në zhvillimin e këqyrjes të filluar prej tij.

2. Në ngjarje të kësaj natyre në përbërje të grupit hetimorë, veç personave të tjerë, të përfshihet dhe një ekspert i Njesisë Speciale të anti-eksplozivëve në përbërje të Forcave Speciale të Policisë së Shtetit, të cilët janë të specializuar për zbulimin, zbërthimin, çminimin, heqjen, shkatërrimin, transportimin, ruajtjen e minave, mjeteve, kurtheve me lëndë eksplozive, bombave, aviobombave dhe predhave të ndryshme.

2.1 Ekspertët e kësaj njësie, përveç përcaktimit, fiksimit dhe mbledhjes së provave materiale, kanë pajisje të veçanta dhe janë të specializuar edhe për gjetjen dhe eliminimin e pajisjeve sekondare dhe ngarkesave të paplasura, për gjetjen e pajisjeve që për shkak të dëmtimit mund të veprojnë ose të shpërthejnë

¹ Shih, neni 300 pika 2 e K. Penale;

² Shih, po aty, neni 300/ pika 1. 304 pika 2;

me vonesë apo për eliminimin e shpërthimit të tyre, etj.

3. Gjurmët dhe provat materiale të zbuluara në vendngjarje të kësaj natyre, pasi fotografohen ose filmohen dhe skicohen, bëhet fiksimi i tyre, duke përshkruar hollësisht, emërtimin, vendin e zbulimit dhe kushtet e ruajtjes, llojin e materialit, ngjyrën, cilësitë, shenjat e veçanta dhe formën, përmasat me saktësi dhe/ose pesha, mbishkrimi, etiketa ose emërtimi kur ka, lëndët e huaja që mbartin, gjurmët e veçori të tjera.

3.1 Rezultatet e këqyrjes në ngjarje të kësaj natyre³ fiksohen në:

- procesverbalin e këqyrjes së vendit të ngjarjes dhe
- fotografohen ose filmohen dhe skicohen, si dhe
- vendoset sekuestrimi i provave materiale dhe sendeve që lidhen me to.

4. Në procesin e këqyrjes, fiksimit dhe sekuestrimit të provave materiale të kësaj natyre të bëhet kujdes duke vlerësuar veçoritë e lëndëve eksplozive, si më poshtë:

4.1 Eksplozivet ushtarake ose komerciale, të përgatitura si ngarkesa apo kurthe me lëndë eksplozive, të përshkruhen me hollësi të ndarë sipas llojeve e tipave. Mbështjellëset e tyre të hiqen me kujdes, t'i jepen ekspertit kriminalist për ekzaminim të nevojshëm dhe më pas të paketohen sipas rregullave.

4.2 Municionet luftarake të gjetura në vende të ndryshme, të vendosura si kurthe ose mina të paheqëshme (predha, granata, bomba ose aviobomba, granata kundër këmbësisë, predhat e granat hedhësit kundër tank, etj.), detonatorët (e zakonshëm, elektrikë, ndezësit, djegoret e të gjithë llojeve), si dhe fitili detonator, të njohura në rregulloret teknike përkatëse, të fiksohen në zbatim të rregullave të përshkruara më sipër.

5. Në këto raste të kërkohet ekspertimi i menjëhershëm i provave materiale lëndë eksplozive⁴.

5.1 Specialistëve të Njësisë Speciale të Anti-eksplozivëve ose në mungesë të tyre specialistëve të tjerë të kësaj fushë të thirrur në cilësinë e ekspertit, t'i kërkohet kryerja e ekspertimit teknik të provave materiale me përbërje lëndë eksplozive. Në vendimin për ekspertim, veç të tjerave të kërkohet dhe përcaktimi i shkallës së rrezikut për ruajtjen e mëtejshme, i mundësisë së vetshpërthimit dhe nëse është i domosdoshëm

³ Shih, po aty, nenet 300, 188, 294, 208, 303/ç;

⁴ Shih, po aty, nenet 294/3, 178-185;

asgjësimi i tyre.

6. Oficerët e policisë gjyqësore duhet t'i dërgojnë pa vonesë prokurorit⁵⁵, procesverbalin e sekuestrimit të provave materiale lëndë eksplozive, të shoqëruar me aktin e ekspertimit teknik, ku veç konkluzioneve për gjendjen teknike, të jetë argumentuar mundësia e shpërthimeve të mëvonshme dhe/ose nëse është e domosdoshme asgjësimi i tyre.

7. Në rastet kur eksperti argumenton se është i domosdoshëm asgjësimi i provave materiale me përmbajtje lëndë eksplozive, prokurorët, krahas vlerësimit të sekuestros⁶, urdhëron edhe asgjësimin e tyre⁷, duke u mbajtur aktet përkatëse.

8. Kur për sekuestrimin e provave materiale me përmbajtje lëndë eksplozive disponohet në gjykatë, prokurori në kërkesën e tij, veç të tjerave duhet të vlerësoj dhe argumentojë, shkallën e rrezikut për ruajtjen e mëtejshme dhe nëse është i domosdoshëm asgjësimi i tyre⁸.

Kjo qarkore të punohet me të gjithë prokurorët dhe oficerët e policisë gjyqësore. Drejtuesit e prokurorive, prokurorët dhe drejtuesit e shërbimeve të policisë gjyqësore, të marrin masat e duhura organizative dhe ligjore, si dhe të bëjnë kujdes të veçantë për të kontrolluar zbatimin e kuadrit ligjor dhe porosive të dhëna në këtë qarkore, për mbledhjen, ruajtjen dhe asgjësimin e provave materiale me përbërje lëndë eksplozive, me synim parandalimin e ngjarjeve me pasoja të rënda për shëndetin ose jetën e njerëzve apo shkaktimin e dëmeve materiale nga eksplozimi i mundshëm i tyre.

PROKURORI I PËRGJITHSHËM

Konc&Kom K.L

9. 04. 07

THEODHORI SOLLAKU



⁵ Shih, po aty, nenet 301/1, 185;

⁶ Shih, po aty, neni 303/2;

⁷ Shih, po aty, neni 215/3;

⁸ Shih, po aty, nenet 208, 215/3;



REPUBLIKA E SHQIPËRISË
ZYRA E PROKURORIT TË PËRGGJITHSHËM
DREJTORIA E STUDIMEVE

Nr. 435 Prot.

Tiranë, me 15. 02. 2007

LËNDA: Për mbrojtjen e interesave pasurore në procedimin penal.

PROKURORIVE TË SHKALLËS SË PARË

PROKURORIVE TË APELEVE

DREJTORIVE DHE SEKTORËVE

KËTU

Shqyrtimi i padisë civile bashkë me procedimin penal, kur nuk bëhet shkak që të pengohet procedimi penal, është i dobishëm dhe efektiv, sepse së pari, i rikthen në kohë të drejtat dhe interesat materiale të dëmtuarit nga vepra penale, dhe së dyti, për ekonomi gjyqësore, shmangë riadministrimin e të njëjtave prova për të njëjtin fakt në një gjykatë civile.

Ju sjellim në vëmendje se padia civile në procesin penal ngrihet, gjatë hetimeve paraprake dhe deri sa nuk ka filluar shqyrtimi gjyqësor i procedimit penal, nga ai që ka pësuar dëm material nga vepra penale ose trashëgimtarët e tij, kundër të pandehurit ose të paditurit civil, për të kërkuar kthimin e pasurisë dhe shpërblimin e dëmit të shkaktuar paditësit civil⁹.

Ju bëj me dije, se me ligjin nr. 9673, datë 29. 12. 2007 "*Për disa shtesa dhe ndryshime në ligjin nr. 8551, datë 18. 11. 1999 "Për avokaturën e shtetit"*", i cili ka hyrë në fuqi me datë 5 shkurt 2007, institucioni Avokatura e Shtetit kalon në vartësi të Ministrisë së Drejtësisë. Në nenin 1/b të shtuar të këtij ligji është parashikuar *mbrojtja e interesave pasurore të shtetit në gjykimin penal* Për të mundësuar ngritjen e padisë civile në procesin penal në mbrojtje të interesave pasurore të shtetit, në këtë nen është parashikuar **detyrimi i drejtuesit të**

⁹ Shih, nenet 61-62 të K. Pr. Penale.

prokurorisë së rrethit gjyqësor (shkallës së parë) për të njoftuar Avokaturën e Shtetit, brenda 7 ditëve nga dita e regjistrimit të procedimit penal për vepra penale, nga të cilat ka dyshime se janë dënuar interesat pasurore të institucioneve shtetërore ose të personave juridik publikë.

Prokurorët, në hetimet paraprake, mbi kërkesën e të dëmtuarit ose paditësit civil në procesin penal, duhet të kërkojnë në gjykatë sekuestron konservative të pasurisë së luajtshme ose të paluajtshme të të pandehurit ose të shumave a sendeve që të tjerët i detyrohen atij², në caqet që ligji lejon sekuestrimin e tyre, për të siguruar:

- kthimin e pasurisë,
- shpërblimin e dëmit dhe;
- çdo detyrimi ndaj pasurisë së shtetit.

Prokurorët, gjithashtu, duhet të kërkojnë kryesisht në gjykatë sekuestron konservative të pasurisë së luajtshme ose të paluajtshme të të pandehurit ose te shumave a sendeve që të tjerët i detyrohen atij, ne caqet që ligji lejon sekuestrimin e tyre,³ kur kanë arsye të bazuara për te menduar se nuk ka garanci për:

- pagimin e dënimit me gjobë kur vepra penale e kryer nga i pandehuri parashikon gjobën si dënim kryesor, etj,
- pagimin e shpenzimeve procedurale.

Kjo qarkore të punohet me të gjithë prokurorët dhe oficerët e policisë gjyqësore. **Drejtuesit e prokurorive dhe prokurorët, menjëherë të evidentojnë procedimet penale të regjistruara (në hetim ose që është ngritur akuzë në gjykate por që nuk ka filluar shqyrtimi gjyqësorë) për vepra penale, nga të cilat ka dyshime se janë cenuar interesat pasurore të institucioneve shtetërore ose të personave juridik publikë, dhe të njoftojnë Avokaturën e Shtetit.** Drejtuesit e prokurorive, të marrin masat e duhura organizative dhe ligjore, për zbatimin e ligjit të sipër përmendur dhe për të kontrolluar prokurorët në zbatimin e ligjit procedural penal, si dhe të porosive të kësaj qarkore.

PROKURORI I PËRGJITHSHËM

THEODHORI SOLLAKU



LIGJ
Nr. 9673, datë 29.12.2006

**PËR DISA SHTESA DHE NDRYSHIME NË LIGJIN NR. 8551, DATË 18.11.1999 "PËR
AVOKATURËN E SHTETIT"**

Në mbështetje të neneve 78 dhe 83 pika 1 të Kushtetutës, me propozimin e Këshillit të Ministrave,

KUVENDI
I REPUBLIKËS SË SHQIPËRISË

VENDOSI:

Në ligjin nr. 8551, datë 18.11.1999 "Për Avokaturën e Shtetit" bëhen këto shtesa dhe ndryshime:

Neni 1

Në nenin 1 bëhen ndryshimet dhe shtesat e mëposhtme:

1. Shkronja "a" e pikës 1 ndryshohet si më poshtë:
"a) në çështjet gjyqësore, me objekt gjykimi me vlerë mbi 5 000 000 (pesë milionë) lekë, ku një organ qendror ose vendor i administratës publike është palë kundrejt një personi privat."
2. Pas shkronjës "a" të pikës 1 shtohet shkronja "a/1" me këtë përmbajtje:
"a/1) në çështjet gjyqësore, ku është palë një organ i administratës tatimore ose doganore kundrejt një personi privat, si edhe në çështjet gjyqësore, që kanë të bëjnë me mosmarrëveshje, që rrjedhin nga kontratat administrative, sipas kuptimit të nenit 151 të Kodit të Procedurave Administrative, me vlerë mbi 5 000 000 (pesë milionë) lekë."
3. Pika 2 ndryshohet si më poshtë:
" 2. Sipas kriterëve të pikës 1 të këtij neni, Avokatura e Shtetit përfaqëson dhe mbron në gjyq interesat pasurorë të shtetit në mosmarrëveshje që mund të lindin për investimet e tij në subjektet publike ose private apo në çdo marrëveshje tjetër, ku mund të jetë cenuar apo mund të cenohet pasuria e shtetit."
4. Pika 4 ndryshohet si më poshtë:
"4. Në çështje të veçanta, Avokati i Përgjithshëm i Shtetit mund të delegojë që, në gjykimin në shkallë të parë, mbrojtja të bëhet nga përfaqësues të organit të interesuar të administratës."
5. Pika 6 ndryshohet si më poshtë:
"6. Avokatura e Shtetit, për çështje që kërkojnë specializim në fusha të caktuara të së drejtës ose që janë të rëndësishme së veçantë, mund të pajtojë për përfaqësim e mbrojtje avokatë të lirë, sipas këtij ligji dhe rregullores së Avokaturës së Shtetit, të miratuar nga Ministri i Drejtësisë."
6. Pas pikës 6 shtohet pika 7 me këtë përmbajtje:
"7. Avokatura e Shtetit ka të drejtë të ngrëjë padi me objekt për pavlefshmëritë e veprimeve juridike e kontratave administrative me vlerë mbi 5 000 000 (pesë milionë) lekë, apo të kërkojë rishikimin e vendimeve gjyqësore të formës së prerë, në përputhje me kushtet dhe kriteret e përcaktuara në ligjin procedural dhe në këtë ligj."

Neni 2

Pas nenit 1 shtohen nenet 1/a dhe 1/b me këtë përmbajtje:

"Neni 1/a

Fillimi i gjykimit për pavlefshmëri të veprimeve juridike ose kontratave administrative

1. Avokatura e Shtetit, sipas kërkesës së motivuar të organit përgjegjës të institucionit të interesuar, ka të drejtë të fillojë procedurat për ngritjen e padisë, me objekt për pavlefshmëri të veprimit juridik, që tjetëron ose disponon pasurinë shtetërore në favor të të tretëve ose për pavlefshmëri të kontratave administrative, të lidhura me të tretë, me vlerë mbi 5 000 000 (pesë milionë) lekë.
2. Avokatura e Shtetit, përpara se të depozitojë padinë në gjykatë, i paraqet organit të interesuar një raport të hollësishëm për gjendjen e fakteve dhe të ligjit, kostot e pritshme të gjykimit, si dhe për çdo shpenzim të zakonshëm/të jashtëzakonshëm apo çdo dëmshpërblim pasuror/ jopasuror, që pala tjetër mund të pretendojë ose të fitojë gjatë apo pas përfundimit të gjykimit për shpalljen e pavlefshme të kontratës ose të veprimit juridik. Në këtë raport, Avokatura e Shtetit është e detyruar të shprehë qëndrimin për ngritjen ose jo të padisë.
3. Organi i interesuar, pasi njihet me raportin e Avokaturës së Shtetit, të hartuar sipas pikës 2 të këtij neni, jep pëlqimin për ngritjen ose jo të padisë.
4. Në rast se ndërmjet organit të interesuar dhe Avokaturës së Shtetit ka mendime të ndryshme për vlerësimin për fillimin e gjykimit për pavlefshmëri të veprimit juridik ose të kontratës administrative, çështja i paraqitet Ministrit të Drejtësisë. Një kopje e mendimeve të Ministrit të Drejtësisë i dërgohet për dijeni organit të interesuar. Kopja me mendimet e Ministrit të Drejtësisë është konfidenciale dhe nuk mund të përdoret në gjykim si provë.
5. Mendimi i Ministrit të Drejtësisë nuk sjell asnjë pasojë juridike për subjektin e interesuar për fillim gjykimi dhe pëlqimi i dhënë, sipas pikës 3 të këtij neni, mbetet në fuqi. Mendimi i Ministrit të Drejtësisë shërben si rrethanë për të vlerësuar punën e Avokaturës së Shtetit ose të organit të interesuar të administratës. Nëse padia është ngritur, mendimi mund të përdoret për këtë qëllim vetëm pas përfundimit të gjykimit, me vendim të formës së prerë.

Neni 1/b

Mbrojtja e interesave pasurorë të shtetit në gjykimin penal

1. Drejtuesi i prokurorisë së rrethit gjyqësor njofton Avokaturën e Shtetit brenda 7 ditëve nga dita e regjistrimit të procedimit penal për vepra penale, nga të cilat ka dyshime se janë cenuar interesat pasurorë të institucioneve shtetërore ose të personave juridikë publikë.
2. Avokatura e Shtetit ngre padi civile në procesin penal për kërkimin e pasurisë ose shpërblimin e dëmit, që u është shkaktuar interesave të shtetit nga kryerja e veprës penale.
3. Avokatura e Shtetit mund t'i delegojë të drejtën e parashikuar në pikën 2 të këtij neni organit qendror ose vendor të administratës, që ka interes të drejtpërdrejtë, ose organit epror të personit

juridik publik, në rast se vlera e dëmit është më pak se 1 milion lekë. Delegimi është i vlefshëm për gjykimin në shkallë të parë dhe në gjykatën e apelit."

Neni 3

Në nenin 2 bëhen ndryshimet dhe shtesat e mëposhtme:

1. Pika 1 ndryshohet si më poshtë:
"1. Avokatura e Shtetit, në mbrojtje të të drejtave dhe të interesave të shtetit, u jep mendim me shkrim organeve të administratës publike, kur kjo i kërkohet prej tyre, në veçanti, për të vënë në lëvizje, për të kundërshtuar ose për të tërhequr çështje në gjykim."
2. Pas pikës 2 shtohet pika 2/1 me këtë përmbajtje:
" 2/1. Për hartimin dhe nënshkrimin e kontratave administrative, të parashikuara nga neni 151 i Kodit të Procedurave Administrative, me vlerë mbi 5 000 000 (pesë milionë) lekë, këshillimi i organit përkatës të administratës publike me Avokaturën e Shtetit është i detyrueshëm. Në raste të tilla, me propozimin e Ministrit të Drejtësisë, Kryeministri mund të pajtojë avokatë të huaj, me njohuri të posaçme në fushën përkatëse, të cilët asistojnë Avokaturën e Shtetit dhe organin përgjegjës."
3. Pika 4 ndryshohet si më poshtë:
"4. Ministri i Drejtësisë mund ta ngarkojë Avokaturën e Shtetit të japë mendim për projektet, që lidhen me veprimtarinë e organeve të administratës publike."
4. Në pikën 5, pas fjalëve "nuk mund të kërkojë" shtohet fjala "drejtpërdrejt".

Neni 4

Neni 3 ndryshohet si më poshtë:

"Neni 3

Ndërmjetësimi dhe pajtimi

1. Avokatura e Shtetit ndërmjetëson për zgjidhjen me pajtim të mosmarrëveshjeve ndërmjet organeve qendrore të administratës publike dhe enteve publike. Zgjidhja e propozuar nga Avokatura e Shtetit u paraqitet për miratim Ministrit të Drejtësisë dhe Ministrit të Financave. Miratimi i dhënë prej tyre materializohet në një urdhër të përbashkët dhe, vetëm pas kësaj, bëhet e detyrueshme për palët në mosmarrëveshje.
2. Avokatura e Shtetit rekomandon zgjidhje me pajtim për mosmarrëveshjet ndërmjet një organi qendror ose vendor të administratës publike dhe një organi tjetër qendror ose vendor, kur ata e kërkojnë këtë zgjidhje. Nuk mund të jepen rekomandime për çështje të mosmarrëveshjeve për kompetencat."

Neni 5

Neni 4 ndryshohet si më poshtë:

"Neni 4 Kufizime

Avokatura e Shtetit nuk mund të përfaqësojë dhe as të këshillojë për çështjet gjyqësore të një organi qendror ose vendor të administratës publike kundër një organi tjetër qendror ose vendor, si dhe për çështjet gjyqësore ndërmjet administratës publike e punonjësve të saj, për marrëdhëniet e punës."

Neni 6

Pika 1 e nenit 5 ndryshohet si më poshtë:
"1. Organet e administratës publike detyrohen t'i japin Avokaturës së Shtetit të gjitha sqarimet, informacionet dhe dokumentet e nevojshme, që lidhen me procesin gjyqësor apo këshillimor, brenda 5 ditëve nga data e paraqitjes së kërkesës. Në rast se nga organet e administratës publike nuk respektohet parashikimi i mësipërm, Avokatura e Shtetit njofton Ministrin e Drejtësisë dhe strukturën përkatëse të kontrollit pranë Kryeministrit. Organet e administratës publike, nëse kanë vendosur të ngrënë padi kundër personave privatë për çështjet me objekt me vlerë mbi 5 000 000 (pesë milionë) lekë, të ndryshme nga ato të parashikuara në nenin 1/b të këtij ligji, detyrohen të njoftojnë menjëherë Avokaturën e Shtetit, duke i vënë asaj në dispozicion të gjithë dokumentacionin e nevojshëm. Nëse Avokatura e Shtetit ia delegon të drejtën e përfaqësimit organit përkatës të administratës, ky i fundit është i detyruar të njoftojë për rezultatin e gjykimit në shkallë të parë dhe të kërkojë këshillë për apelim. Organet e administratës publike, në rast se kanë vendosur të ngrënë padi kundër personave privatë, për çështje me objekt me vlerë më pak se 5 milionë lekë, të ndryshme nga ato të parashikuara në nenin 1/b të këtij ligji, mund të kërkojnë mendimin e Avokaturës së Shtetit, por ky mendim nuk është i detyrueshëm dhe nuk mund të krijojë konflikt mendimesh, në kuptim të nenit 6 të këtij ligji. Organet e administratës publike, në rast se paditen në gjykatë për çështje të parashikuara në shkronjat "a" dhe "a/1" të nenit 1 të këtij ligji, detyrohen të njoftojnë menjëherë Avokaturën e Shtetit dhe t'i vënë asaj në dispozicion të gjitha dokumentet, që kanë rëndësi për çështjen. Njoftimi i kryer nga gjykata, sipas nenit 79/a të Kodit të Procedurës Civile, nuk e përjashton organin e administratës nga detyrimi për njoftim."

Neni 7

Neni 6 ndryshohet si më poshtë:

**"Neni 6
Zgjidhja e konfliktit të mendimeve**

Në rast se Avokatura e Shtetit dhe organi i interesuar i administratës publike kanë mendime të ndryshme për ecurinë e çështjeve gjyqësore, që parashikohen në shkronjat "a " dhe "a/1" të nenit 1 të këtij ligji, konflikti zgjidhet, sipas rastit, nga organi i zgjedhur vendor, ministri përkatës apo Ministri i Drejtësisë."

Neni 8

Në nenin 7 bëhen këto ndryshime:
1. Pika 1 ndryshohet si më poshtë:
"1. Avokatura e Shtetit është institucion në varësi të Ministrit të Drejtësisë. Avokatura e Shtetit ushtron veprimtarinë në përputhje me këtë ligj. Avokatura e Shtetit drejtohet nga Avokati i Përgjithshëm i Shtetit."
2. Pika 3 ndryshohet si më poshtë:
" 3. Struktura dhe organika e Avokaturës së Shtetit miratohen me urdhër të Kryeministrit, me propozimin e Ministrit të Drejtësisë."

Neni 9

Neni 8 ndryshohet si më poshtë:

**"Neni 8
Avokati i Përgjithshëm i Shtetit**

1. Avokati i Përgjithshëm i Shtetit emërohet dhe lirohet/shkarkohet në detyrë me urdhër të Kryeministrit, sipas propozimit të Ministrit të Drejtësisë, nga radhët e juristëve me të paktën 10 vjet përvojë në profesion.
2. Avokati i Përgjithshëm i Shtetit zëvendësohet me porosi të tij, kur është në pamundësi të përkohshme për të ushtruar funksionin, nga avokati më i vjetër në moshë në Avokaturën e Shtetit.
Me urdhër të Kryeministrit, kur vendi i Avokatit të Përgjithshëm të Shtetit mbetet i lirë, mund të emërohet në këtë detyrë një avokat, në detyrë pranë Avokaturës së Përgjithshme, derisa të emërohet Avokati i ri i Përgjithshëm i Shtetit.
3. Avokati i Përgjithshëm:

- a) mbikëqyr dhe përgjigjet për mbarëvajtjen e punës në të gjitha zyrat, personelin dhe shërbimin e Avokaturës së Shtetit dhe drejton organizimin e tyre;
- b) bën shpërndarjen e çështjeve gjyqësore dhe të kërkesave për dhënie mendimi me shkrim në institucionin që ai drejton;
- c) miraton kërkesën e Avokatit të Shtetit, për t' i ngarkuar vetë organit të interesuar mbrojtjen në shkallë të parë;
- ç) jep udhëzime të brendshme për trajtimin e çështjeve gjyqësore dhe të këshillimeve ligjore;
- d) raporton te Ministri i Drejtësisë, jo më pak se një herë në muaj, për veprimtarinë e kryer nga Avokatura e Shtetit, duke theksuar mangësitë e mundshme ligjore dhe nevojat për ndryshime përkatëse;
- dh) paraqet një raport vjetor përpara Ministrin të Drejtësisë për dëmin e shkaktuar ndaj interesave publikë nga veprimet e organeve të administratës publike;
- e) i propozon Ministrin të Drejtësisë të paktën nga tri kandidatura për kryetarë të degëve të zyrave vendore pranë gjykatës së apelit;
- ë) i raporton Ministrin të Drejtësisë, me kërkesë të këtij të fundit ose me nismën e vet, për çështje të veçanta, për të cilat ka marrë dijeni para dhe gjatë përfaqësimit të mbrojtjes së interesave shtetërorë".

Neni 10

Nenet 9 dhe 10 shfuqizohen.

Neni 11

Shkronja "c" e pikës 2 të nenit 11 ndryshohet si më poshtë:

"c) organizon takime këshilluese dhe seminare kualifikuese me avokatë, që punojnë në Avokaturën e Shtetit, si dhe me juristë të organeve të administratës publike.".

Neni 12

Neni 12 shfuqizohet.

Neni 13

Në shkronjën "d" të pikës 1 të nenit 13 fjala "e personave" zëvendësohet me fjalët "e avokatëve të zyrave vendore".

Neni 14

Në nenin 14 bëhen këto ndryshime e shtesa:

1. Titulli "Avokati i Shtetit pranë gjykatës së apelit" zëvendësohet me titullin "Zyra vendore e Avokatisë së Shtetit".
2. Pika 1 ndryshohet si më poshtë:
"1. Avokati i Shtetit në zyrën vendore të Avokaturës së Shtetit emërohet nga Ministri i Drejtësisë, me propozimin e Avokatit të Përgjithshëm të Shtetit. Zyrat vendore që, sipas organikës së përcaktuar, kanë më shumë se 1 avokat, drejtohen nga njëri prej tyre, i cili emërohet dhe shkarkohet nga kjo detyrë nga Ministri i Drejtësisë, sipas propozimit të Avokatit të Përgjithshëm të Shtetit".
3. Pas pikës 1 shtohet pika 1/a me këtë përmbajtje:
"1/a. Ministri i Drejtësisë siguron dhe garanton mirëfunksionimin e zyrave të avokatisë vendore në mjedise shtetërore ose, në mungesë të tyre, në mjedise të përshtatshme, të marra me qira nga të tretë".
4. Fjalja e parë e pikës 2 ndryshohet si më poshtë:
"Avokati i Shtetit, që drejton zyrën pranë çdo gjykate apeli".
5. Pas pikës 2 shtohet pika 3 me këtë përmbajtje:
" 3. Funkzioni i drejtuesit të zyrës vendore, e cila ka në organikë vetëm një avokat, kryhet nga ky avokat".

Neni 15

Pika 3 e nenit 15 ndryshohet si më poshtë:

"3. Avokati i Shtetit, në rast mospërputhjeje në mendim me drejtuesin e zyrës vendore përkatëse, mund t'i kërkojë me shkrim Avokatit të Përgjithshëm të Shtetit deklarin për çështjen dhe, në rast se edhe deklarimi i këtij të fundit është në kundërshtim me mendimin e tij, i kërkon zëvendësimin për trajtimin e çështjes gjyqësore apo të këshillimit, për të cilin ka lindur mospërputhja".

Neni 16

Në nenin 16 bëhen këto ndryshime:

1. Pika 1 ndryshohet si më poshtë:
"1. Në çështje të rëndësishme për interesat e shtetit ose kur natyra e çështjes kërkon juristë të specializuar në fusha të veçanta, Avokati i Përgjithshëm vetë ose me propozim të avokatit të shtetit, pranë gjykatës së apelit, për gjykimet deri në gjykatën e apelit, pajton avokatë në profesion të lirë, me miratimin e Ministrisë të Drejtësisë".
2. Pika 5 ndryshohet si më poshtë:
"5. Avokatura e Shtetit përgatit buletine të rregullta periodike çdo 6 muaj për listën e avokatëve të pajtuar, çështjet në ndjekje, shpërblimet përkatëse, të cilat i bën publike për të tretë në faqen e

saj

të

internetit."

Neni 17

Në shkronjën "b" të nenit 17 lidhëza "dhe" zëvendësohet me lidhëzën "ose".

Neni 18

Neni 18 ndryshohet si më poshtë:

"Neni 18 Papajtueshmëria

Avokati i Përgjithshëm, si dhe çdo avokat i shtetit nuk lejohen të kryejnë funksione të tjera publike dhe private."

Neni 19

Në nenin 19, pas shprehjes "Kodit të Procedurave Administrative" shtohet shprehja "dhe ligjit nr. 9367, datë 7.4.2005 "Për parandalimin e konfliktit të interesave në ushtrimin e funksioneve publike"".

Neni 20

Në nenin 20, pas shkronjës "ç" shtohen shkronjat "d", "dh" dhe "e" me këtë përmbajtje:
"d) kryen akte dhe sjellje, që diskreditojnë rëndë figurën e tij dhe institucionin;
dh) shkel dispozitat e këtij ligji dhe etikën;
e) thyen disiplinën në punë, në mënyrë të përsëritur, edhe pas paralajmërimit të dhënë me shkrim nga ana e eprorit."

Neni 21

Neni 23 ndryshohet si më poshtë:

"Neni 23

Ngarkohet Ministri i Drejtësisë të nxjerrë urdhra dhe udhëzime për organizimin dhe funksionimin e brendshëm të Avokaturës së Shtetit. Ministria e Drejtësisë merr masa që, brenda 30 ditëve nga hyrja në fuqi e këtij ligji, të bëjë, në përputhje me këtë ligj, transferimin e institucionit të Avokatit të Shtetit. Deri në miratimin e strukturës, sipas nenit 8 të këtij ligji, personeli i Avokaturës së Shtetit të vazhdojë efektet financiare sipas ligjit të mëparshëm. Buxheti i institucionit të Avokatit të Shtetit administrohet nga Ministria e Drejtësisë."

Neni 22

Ky ligj hyn në fuqi 15 ditë pas botimit në Fletoren Zyrtare.

Shpallur me dekretin nr. 5186, datë 12.1.2007 të Presidentit të Republikës së Shqipërisë,
Alfred Moisiu